

***"Nuvaraha esuapa
ema Jesucristo
apaesa
máitavacacaina
eta ítaresira."***

Porciones seleccionados del Evangelio de San Juan

Éma Apóstole Juan májuequenehahi eta máichararacavahi ema Jesucristo

Éta acane, te táepaniravahi tamutu, matiarhihique-
néipahi ema Jesucristo, ema Tímimatirahi me Viya.
Éma, macachanehi ema Maiya eta máitaresirahi, Víyahivare
éma apanavare. Éna apinana, nacuticacahi eta napane-
reruana. Éta táepaniravahi eta acane, émaríhi ema Cristo
ticaemataneacahi tamutu eta tatiarhihiqueneanahi puiti,
máitauchirahi eta mapanereruanahi ema Maiya. Tájina
máejequeruinahini, nájinavare apanainahini náepiyacahini eta
tatiarhihiqueneana. Émarichuhivare ticaitarecahavihi viti
achaneana. Émarichuvare tinacapa te viáchanevana eta
tamichahu eta vítaresirahi. Éma tímiyanava tímicauchahavi
taicha mavaraha máimijunijisinahiviyare eta tamapicu te
viáchanevana. Nararíhisera éna vahi náuricahini eta mamicau-
chinavaca. Navaraha nacaemaha eta mamicauchiravacahi.

Tacahe, te máimahapa tiuri, ema Jesucristo tiúcupaicapa
te juca apaquehe. Tiáchanechavapa. Yátupiquenehi achane,
macaechehi eta veche viti achaneana. Ticasiriquihavihi te
jena áñoanahi majurusirahi. Matiaríhivare ema apana achane
ticaijarehi Juan Tícachasiricarahi. Tacahe, ema Viya, te
máimahapa tiuri, ticavanahipa ema Juan. Máinapumirau-
chayarehi eta macametarairuyare eta máimeresiravaya ema
Cristo, ema namicahuyare nácani ticasíñavanayare mayehe.
Éma Juan mametacayarehi éna achaneana natsecava eta
najacapiraya ema Cristo. Éma Juan, vahi émainahini
tímicamurimahi éna achaneana. Émahisera
ticametarairurahiyarehi eta máucupaisirapa ema tiámahavihi
eta yátupiqueneana mapanereruanahi ema Viya. Éma
maca máechajisihaquene ema Juan, éma yátupiquenehi eta
mamicauchirahiyarehi vimutu viti achaneana, taicha tímitu-
cahavi eta mapanereruana ema Viya.

Éma Jesucristo, émahí acane tépiyacahí tamutu eta apaquehe, énapa ena viáchucanaveanaini. Puíticha éma téchahavi vimutu. Téhesera te tiúcupaicapa éma, namaimati-quenehi ena achaneana Viáquenuirahí éma, váhivare navarahahini najacpahini éma. Natiarihisera ena tinerejicavanahí tijacapanahí, téhicanahí éma. Ena nani, ichaperinehi eta macunachiravacahí táichavene eta nacasiñairavahí mayehe. Éna, yátupiqueneripa machichanaveanahí ema Viya. Eta macachichairahavihi ema Viya víti, émahí ema Viya tinerejicahavi táichavene eta vicasíñairavahí mayehe. Vahí étaparacainahipucaini eta náehisirainahipucaini ena ticachichahaviana. Váhivare étaparacainahipucaini vivarahahipucaini ichape víti. Váhivare étaparacainahipucaini ichapenahipucaini eta mavarairahini mácani apana achane.

Viti véhicanahí ema Jesús eta matiaríhirahí te juca apaquehe, yátupi eta vímatirahí éma. Vímahahí te viúquihana. Vímativarepa eta másihairahí te anuma, eta émahí ema macarichuquenehi Machicha ema Viya. Yátupihivare eta víyairahí éma, macutihí ema Maiya. Éma, tímimatirahí me Viya, taicha éma máimerecahí eta máetaviuchirahí eta máemunasirahavihi, máimechirahavíhivare eta yátupiqueneana mapanereruana ema Maiya. Éma víyarahaini Moisés ticatuparahahí me Viya eta máimitusirahavihi viti achaneana eta vanairipiana. Émasera ema Jesucristo ticatuparahahí me Maiya eta máimitusirahavihi eta máemunasirahavihi, étapa eta máechajiruvana yátupiqueneana ema Viya. Éma Cristo, tétavicavahí eta máuriva eta viyehe vimutu. Éta majaneasirahavipahí, tíjaracahavihi eta vitumevahí te tamutu sácheana. Émaripa ema Juan, ani macahehí eta máechajisíhairahí ema Jesús: “Émara ema maca ema néchajisíhaquenehi eta eyehe cape juca. Yátupi núti nínapucahí eta núchusirahí, émasera matiaríhiqueneipahí eta acane, májinanuichahahí núti. Éta tacahe, típicauchacarepanahí eta nuyehe” macahepa.

Yátupiquene nájina náimatihini eta máimahi ema Viya. Émasera ema macarichuquene Machicha, tímimatichahavihi eta máuriva ema Maiya taicha étaquenehi másiha te masamure ema Maiya.

**Éma Juan máimicaecheracha éma Jesús eta émairahi éma Cordero,
vanairucahi me Viya**

Te apanapa sache, máimahapa éma Juan eta mapauchira-paipahi éma Jesús. Tacahe, máichavacapa éna achaneana:

—Ímaha, márajapa éma Cordero, matapiravarequene éma, vanairucahi me Viya. Éma, táimicaparuyare eta macaepaharayare eta vipecaturana viti achaneana te juca apaquehe.

Émara éma maca éma néchajisihaquenehi eta eyehe cape juca. Núti nínapucahi mayehe éma, émasera matiarihiquenéipahi eta acane, májnanuichahahi núti. Eta tacahe, tipicau-chacarepanahi eta nuyehe. Nútiripa néchajisihahi éma, vuíchahasera nímatihini. Numetacahehisera eti nujaneanana israelítana eta ecaicachasiraina apaesa etsecavahi eta ejacampiraina éma te jácani máimerecavapa. Tacahe, cape sache, títecapauchanupa éma Jesús, mavarairahi nícachasicayare éma. Tásiha, te viúcupaicapa te une, nímahapa éma Espíritu Santo eta máucupaisirahi te anuma, ticutiparine eta paloma. Masiapahacapa éma Jesús. Tacahe, te nímahapa, nupaenu-mavapa nímati éma eta émairahi éma vicuchapaquenehi Cristo, taicha éma Viya tímitucanupa eta máicutiarayare. Ani macahehi: “Te pímaha éma Espíritu Santo máucupaucha te mápusi mácani achane, pímatiya eta émairahi éma Nuchicha nuvaneruhi. Éma, tíjaracahevacyare éma Espíritu Santo, tisiapahacahevacainapa éti achaneana. Nuchaneraheinapa éti” máichanupa éma Viya. Tásiha puiti, nímatipa éma. Táitusiava numetacahe puiti eta émairahi éma Cristo, Machicha éma Viya —máichavacapa éma Juan.





**Emá Jesús macuchuchjavacapa ena t́jararecanahi eta sárareana,
cáyureana te tajuhe eta Templo**

Tacahe, eta jena sácheanahi, tiánehiripa eta Pascua, vapiestarahi víti israelítana. Emá Jesús tiyanapa tayehe eta avasare Jerusalén, vítipa víti máimitureana. Te vítecapapa, viyanapa visiapahi tayehe eta Templo. Máimahainehi emá Jesús ena t́siriperecarahiana eta plata, énapa ena t́jararecanahi eta vuíyeana, eta uvesana, étapa eta palómana. Eta máimairahi éna, máepiyacapa eta machicute. Máquijimuríhapa eta naplataneana te apaquehe. Máequehepuichavacapa eta namesarana. Macuchuchjavacapa namutu, étapa eta sárareana nájarareruanahi. Tásiha, máichavacapa ena t́jararecanahi eta paloma:

—¡Ecuchuca eta júcana eta te juca mapenahi emá Tata!
¡Vahi étaina ícuchina éti íjararecana eta tájiparacana!
—máichavacapa.

Tacahe, viti máimitureana, eta vímairahi eta juca, enevanerine véchava eta táechajiriruva eta Salmo tayehe eta tamuracavahi eta máichararacavahi ema víyarahaini David táichavenehi eta máetaviuchirahi eta máimipicauchirahi eta, mapena ema Viya.

Jéhesare, enurujipa títecapanapa ena tuparairucana. Nayaserecapa éma:

—¿Tájaha tacayema eta picuchusiravaca ena vichamuriana? Pímijachavahipuca vanairucavi me Viya. ¡Pímechahavi eta tiáramicare te yátupihipuca pivanahi eta juca! —náichapa.

Ema Jesús majicapavacapa:

—Te iáquipaicayarepuca éti eta juca templo, nútisera nucaechepuca te mapanaquenéna sache —máichapa.

Ena tuparairucana najicapavarepa:

—Cuarenta y seis año eta tayerevahi eta náepiyaresirahi eta Templo. ¡Tétavicavahi eta pisiñavavaisirahi picaemuñavayarehi picaecheputayare te mapanaquenéna sache! —nacahepa.

Eta máichiravacahi ema Jesús, máechajisihahi éma eta táechepusirayare eta máquehe. Eta tacahe, te tiyerehi, te táequenepa eta máechepusirapa ema Jesús te máecari, véchavahi viti máimitureana eta juca mametarapihi tayehe eta máechepusirayarehi. Eta tacahe, visuaparinehi eta táechajisihairahi eta Sagrada Escritura eta mayehe.



Matiaríhi ena achane téhicarairicahi ena fariséoana. Ticaijare Nicodemo. Ena maca achane, tétavicavahi eta macunachacarevahi taicha máestrohi éma. Tacahe, eta jena yátiquenehi, ena Nicodemo tiyanapa mapaipiuchapanapahi ena Jesús. Tacahe, eta náechajirisiravahi, macahepa ena Nicodemo:

—Tata maestro, véchahi eta vanairucavihi me Viya eta juca pítesirahi pímitusirahavipanahi. Taicha nájina apanaina achane títurequenehaimahi eta juca tíáramicareana píchaque-
neanahi píti —macahepa.

Ena Jesús majicapapa:

—Puiti numetacavi eta juca yátupiqueneana: Nácani navarahaya títujicavana tisiapana tayehe eta mávasa ena Viya, tacamunuhi náitsivachayare eta náitairesira. Te vahi yátupina eta náijarasiravaina eta máitsivachiravaca ena Espíritu Santo, vahi títujicavanaimahi tisiapana eta te mávasa ena Viya. Tímicutijiricavayarehi tíápechavanayarehi tíuchucana —máichapa.

Tacahe, ena Nicodemo vahi mácaicutiarahini eta máichirahi ena Jesús. Váhisera macuchapaimahi eta máitametasirahi ena Jesús. Ánipa macahe:

—Váiparinehi vichavaimahi eta amúyahavinahíni viti ichasiana, vichavahivarepucaini visiapahini te sujuhe esu ticachichahavi —macahepa.

Majicapavare ena Jesús:

—Pisamanuchaha. Te tíuchuca eta amuya te sujuhe esu taena, tímaticarehi eta machichairahi ena suima. Tacutiquenehi, nácani mávaháruana ena Espíritu Santo, tíápechavanayare tépanava eta náitairesiranayare, taicha machicharipahi. Nutupiruva numetacavi: Nacarichu ena machichanaveana ena Espíritu Santo tisiapana eta mávasa ena Viya. Te tacuija eta machichairahéna éti, tájina vahi ítujicavaimahi esiapa. Vahi picuarami eta juca níchiravihi: Táitaurevaquene ticachichaheyarehi ena Espíritu Santo.

Eta juca tímicutijiricavahi eta técaticava, tacarichu visama eta tacaemaira. Váhisera tácaecherahini. Ene nacahehi ena mávaháruanaipa ena Espíritu Santo. Nanasirichu eta náimahi. Ticaitsivaipasera eta náitairesira —máichapa ena Jesús.

Tásiha, ema Nicodemo mápechavarepa mayasereca:
—¿Tájahasica tacayema eta juca?

Emá Jesús máichavarepa:

—Tétavicavahi eta picunachacareva píti, taicha tíurihi eta pímitusiravacahi ena vijaneanana. Tasapihaseva vahi pímatiequenehahini eta júcana. Pisamanuchaha. Yátupiquene eta numétasirávihi. Tatupiruvahi eta néchajisihahi eta táichararacavanahi te anuma taicha nímahaipa. Étisera vahi esuapanuimahi eta numetasirahehi eta nímahaqueneanahi. Te cape juca sácheana, nímicutichinahehi eta táichararacavanahi te juca apaquehe tayehe eta táichararacavanahi te anuma. Étisera vahi esuapanuhini. Tavetijipa eta emasuapiranuya te nutupiruvahi numetacahe eta táichararacavanahi te anuma.

Nuti Manerejirunuhi ema Viya, nucavasahi núti te anuma. Tásiha, núcupaicahi eta numetasiraheya. Nájina apanainahini mácani mametacahehini eta táichararacavanahi te anuquehe, taicha nájina nayanahini nápanahini te anuma, eta jácani náimatihini.

Acane, eta napaisira ena viáchucanaveanaini eta te mávapahi apaquehe, táechucapahi eta quichareana ena masuapajirairahanapahi mayehe ema Viya. Tacahe, ema víyarahaini Moisés máepiyacahi eta metal eta táimahi eta quichare. Manacahi te anuquehe eta te yucuqui. Tásiha, ena achaneana táechureana eta quichare, te náesenica eta quichare máepiyaru ema Moisés, tinaracanapahi, vahi náepenapahíni. Ene nucaheyare núti apana, tinacanuana-yareva te anuquehe. Eta níchararacavayare apaesa nucuchucuhapahi namutu ena nácani ticasañanuanayarepahi. Tásiha, máichecuaraquirenapa eta náitaresirayare. Tájina ticamitiequenehavacaimahi.

Emá Viya, tétavicavahi eta máemunasirahavihi

Taicha ema Viya, tétavicavahi eta máemunasirahavi viti achaneana te juca apaquehe. Eta máemunasirahavi, máíjaracahi ema macarichuquenehi Machicha eta máucupaisirahi eta ani viyehe. Mavarahapa tíjaracahaviya máichecuaraquirénapa eta vítaresiraya vimutu viti vicasiñanahi éma.

Tájina ticamitiequenehahavimahi. Taicha ema Viya, vahi tácahehíni eta mapanereruhi eta máucupaisirahi ema Machicha máicuñacahavihini viti achaneana. Étasera eta tímitecahi éma, ticuchucuhahaviyare vimutu. Taicha nácani ticasinānāyare ema Machicha ema Viya, vahi ticaicuñanaimahi. Nácanisera vahi nácasināhini éma táimicuñacavacayarehi eta naviurevanahi éna. Taicha vahi náuricahini eta tamicauchiravacahi eta majaraiva ema Cristo táucupairuhi te juca apaquehe. Étachucha náurica eta timapicu taicha vahi návarahahini tácaecherahini eta náichirahi eta tamauriqueneana. Taicha nácani tíchanahi eta tamauriqueneana, nacaticha eta majaraiva ema Viya. Váiparinehi napauchaimahi, namavarairahi tacaecherahini eta náichirahi eta tamauriqueneana. Énasera ena tisuapanahi yátupi eta máechajiriruva ema Viya, náuricayarehi napaucha eta majaraiva. Jéhesare ticaecheranasarepa eta machaneranaripahi ema Viya.

Ema Jesús másihaquenehi te anuma

Ema Jesús, máimatirinehi tamutu eta táichararacavanahi te anuma taicha másihaquenehi éma te anuma. Víti achaneana viávihahi vicavasanahi te juca apaquehe, vímatihi étachucha eta táichararacavanahi te juca apaquehe. Émasera ema Jesús, eta másihairahi te anuma, tímatihi tamutu, tiápajupanavahi eta máitupajjiasiravahi. Ticachuricahavihi.

Éma, tímitecahi eta mametasirahavi tamutu eta máimahaqueneanahi étapa eta masamaqueneana te anuma. Nájinayarénisera nasuapahini eta macayemaqueneanahi. Vítisera viti visuapanahi eta mametarapiana, vímatihi eta yátupihí eta máechajiriruvana ema Viya mámaqueneanahi ema maca Jesús.

Taicha éma, vanairucahi me Viya, máechajisihayarehi eta máechajiriruvana ema Viya. Énerichuvare tétavicavahi eta máimicatasirahi ema Espíritu Santo taicha mávahácahi éma.

Ema Vicaiyaquene máemunacahi ema Machicha. Eta tacahe, matuparacahi eta émairayarehi téchayare tamutu.

Eta tacahe, nácani ticasinānāyare ema Machicha, máichecuaraquireyare eta náitairesiraya. Namutusera ena macasinārahanahi ema Machicha ema Viya, vahi títarecainaimahi, taicha tanasihi eta naviurevana táichavenehi eta napecaturanahi. Ticaicuñanayarehi máitavacacayare.

Emá Jesús macanaraca emá machicha emá aquenuca majupahahi emá rey

Tásiha, tiápechavavarepa mayanaucha emá Jesús eta avasare Caná, te máepiyasinehi vino eta une. Te apanahivare avasare ticaijare Capernaúm, matiarihihi emá majupaha emá rey. Macajumaquenehi emá machicha. Te masamairiricapa emá achane eta máitecapiraipahi emá Jesús te Caná, tiyanapa matanupanahi. Eta máichimavapa, mayaseacapa eta macatajicahini máehicavanehini te mapena, macanarapanahini emá machicha taicha emá macajumaquene tiánehiripa tépenayahini. Émasera emá Jesús máimatipa eta masamure emá achane, tásiha, máichapa:

—Éti vahi esuapanuimahi, te vahi nímechahehi eta tiáramicareana —máichapa.

Émasera emá achane máichapa:

—Picatajicanuchucha, tátachicha. Péhicanu, machu máepenacaru emá nuchichasami —máichapa.

Emá Jesús majicapapa:

—Tiuri, piyana. Vahi picueñamava, emá pichicha vahi tépenaimahi. Máenahi tinaracaipahi nícha —macahepa.

Tacahe, emá achane masuapapa eta máichirahi emá Jesús. Tiyanapa tichavahi te mapena. Te tiánehipaipahi títecapa te mapena, nácapapa emá macajurureana. Náichapa:

—Tata, emá pichicha tinaracaipahi.

Tacahe, emá mayaserecavacapa:

—¿Tájaha hora te tinaracapa emá nuchicha?

Éna náichapa:

—Cape te la una te cáperehi, táetaviacapa eta fiebre —nacahepa.

Tásiha, emá achane máechapa étairaichuhi eta hora eta mametasirahi emá Jesús eta manarasiraipa emá machicha. Tacahe, ichaperinehi eta masuapirahi éma, énapa éna machichanaveanahi te peti, eta émairahi emá Cristo, Mavaneruhi emá Viya.

Eta juca eta tápinanehi eta tiáramicarehi máichaquenehi te Galilea, te táequenepa eta machavirahi eta te Judea.

Éma Jesús macatuparahaquenehi me Maiya

Énerichuvare éma Jesús máichavacapa:

—Nutupiruva numetacahe: Nuti Machicha éma Viya, éta nutuparahanahi mayehe, váiparinehi nútijiricavaimahi nícha jácani nuvarahaqueneanahi. Núti nímatiequenehahi tamutu éta máematanerepihi éma Ticachichanu. Étayareichuhi níchayarehi núti. Taicha yátupihí éta máemunasiranuhi éma Ticachichanu. Éta tacahe, tímechanuhi tamutu éta máematanerepiana. Énerichuvare tíjaracanuyareva éta nímechiraheya éta apamuri tíáramicareana. Tíápajucavayare éta táramicarevayare, apaesa íáramirineyare, epicayareva. Éma Tata marataha macaecheputa éna náepenaqueneana, máimichavayarehi macaitarecavacaya. Énerichuva nuti Machicha, nura-tahavare nucaitareca nácani nuvarahaqueneanaya, níjaraca éta náítaresiraya. Nucatuparahivare mayehe éma Tata éta nímaíraya éta nacaiçuñairayare namutu éna náejecapavaqueneanahi. Vaípa émainahi tíçuñareca éma. Taicha mavarahahi epicauchanu nuti Machicha, tácutirichu éta epicauchirahi éma Tata. Nácanísera vahí típicauchanuanahi núti, váhivare napicauchaimahi éma Tata.

Yátupiquenevare numetacahe éta juca apana. Nácani ticaçuñanayare tisuapanayare éta néchajiriruvana, nasuapavare éta nucavanahirahi mayehe éma Tata, éna títarecanayare, vaípa ticaçuñanaimahi. Taicha éna, tíúchucuhanaripa tayehe éta náicuñayaréni te yucu. Náicuchihi éta náítaresiraya.

Tacutiquene nutupiruva numetacahe nuti Machicha éma Viya. Táitecapaquenepa puiti juca sácheana, tisamanuanayare éna achaneana, tayanapane tépenahi éta náchanevana. Te nasuapajirahipuca, nucaitarecavacayare éta náchanevana.

Taicha éma Tata namutuhi marataha macaitareca. Ene tacahe éta máíjarasiranuhi núti Machicha éta namutuyareva nurataha nucaitarecavaca. Énerichuvare tituparacaruhi éta níçuñasiravacayahivare taicha yátupiquenenuhi manerejirunuhi. Vahí ecuarami éta juca numetasirahehi. Járájapa éta sácheyare éta nasamirayare namutu éna náepenaqueneana éta nahu núti. Técheputcanainapa namutu te náecariana. Nácani tíchanahi éta táuriqueneana, títarecanainapa. Énasera éna tíchanahi éta tamauriqueneana, ticaçuñanainapa.

Te táequenepa, te jena sácheana tiánehipa eta Pascua, vapiestarasahi viti israelítana. Émasera ema Jesús, tiyanavarepa tiámahavivare eta viánuecahi eta cáquiure Galilea (ticaijarehivare Tiberias). Camurianasera ena achaneana tipaicanapahi téhicanapahi éma, taicha eta náimairahi eta tiáamicareana máichaqueneanahi eta macanarasiravacahi ena nacajumaqueneana. Te vítecapapa te apachara, viyanapa te jácani anuquerehi mávapahi. Tacahe, véjacapa vinaracayarehi. Téhesera te máimahapa ema Jesús ena camuriana achaneana eta náitecapauchirahi, máichapa ema vichamuri Felipe:

—¿Távihapucaini vivacharesihaini eta tinicacare vénisiha-hini namutu ena nani achaneana? —máichapa.

Eta juca mayaseresirahi étachuchanéni eta mavarairahi éma macaicutiarayarehi te tájahapuca macayemayarehi ema Felipe. Taicha ema Jesús máechahi eta máichaqueneyarehi.

Tásiha ema Felipe majicapapa:

—Tacamunuhi vácayehehini eta camuri plata apaesa namutupaini vítaparahahini vénicahini apaesainahini návaminahini. ¡Vahi taratahahini eta dies mil páneana! —macahepa.

Tásiha, téchajicapa ema nuchamuri Andrés, maparapehi ema Pedro. Máichapa:

—Mararihi ani ema émana amaperu tiámapahi eta cinco-chichapahi eta pan, apinapa eta jima. ¡Váiparinehisera náraitamahi ena nani camuriqueneana achaneana! —macahepa.

Émasera ema Jesús máichahavipa:

—Evaneca náejahapaica námutu ena achaneana —macahepa.

Taicha tiúrinapahichíchahi eta apaquehe, muíjpahihivare. Cinco mil eta náichapemurivahi ena ajairana. Vahi náimitupachahini ena esenana énapa ena amaperuana. Tacahe, ema Jesús mavehapa eta páneana. Te tamutupa eta mahasulupayachirahi ema Viya, tíjarachavipa. Véniricapa víti, víjaracavacapaipa eta pan étapa eta jima. Tisimurivacapaipahi eta víjaraca. Tinicanapa namutu. Tisatuheanapa, nacaemacharichahavare. Tásiha, ema Jesús máichahavivarepa:

—Ecurujica eta náemacharajianahi, machu támapuruji —macahepa.

Tásiha, víti vicurujicapa eta pan náemacharajianahi. Táinicachaichahavare eta dócehiquene ichapehiana saye.

Tacahe, eta náimairahi ena achaneana eta juca máichaqueneanahi ema Jesús, ichaperinehi nárami. Tásiha, nacahepa:

—Émaripa ema maca profeta ema vicuchapaquenehi máiteruyarehi te juca apaquehe —nacahepa.

Eta tacahe, navarahapa námayaherini nayeheyarepa rey. Émasera máimatipa eta napanereruhi. Tacahe, térajicavavarepa eta nayehe. Tiyana macarichuhi te tápusi eta cerro.

Éma Jesús mapaicaeca eta une

Tacahe, te jena cáperehichichapa, viyanapa viti máimitureana tayehe eta cáquiure. Te vítecapapa, viávacuhapa te pacure. Viánuecayarehi te apachara. Vicaijuheyarehi eta avasare Capernaum. Tivehahavipa eta yati eta viánuesirahi. Éma Jesús májinahi macachanehavipahini. Éta vipaisirapahi, tachimaracapa eta muraca técaticava. Tépacucapa muraca eta cáquiure. Cinco kilómetroipahi eta viyerehivahi, vétupiecapaipahi, te vímahapa ema Jesús. Mapaicaecapaipahi eta une, tipauchahavipaipa. Víti vipicapa eta vímairahi.

Émasera máichahavipa:

—Vahi ecupicanu. Nútichucha.

Tacahe, vímatipa éma. Viúrisamuréinehi eta vijacapirahi eta mávacuirapa eta te vipacure. Tásiha, vítecapanecha eta te vicaijuheyarehi.



Tacarichu eta máimiturapiana ema Jesús ticaitarerahi te visuapa

Tacahe, ena téhicanahi ema Jesús, eta nasamirahi eta juca máimiturapianahi, camuriana ena vaipa návarahahini náehica. Ánipa nacahe:

—Ticajerapicha eta vicaicutiarirainahini eta juca máimiturapiana. Nájinavare tisuapanaimahi —nacahepa.

Émasera ema Jesús máimatihí eta napanereruanahi eta namavarairaripa náimiyanavahini náehicahini. Tacahe, máichavacapa:

—Páurehehi éti eta evaraha ínajica eta éhisiranu taicha eta emacaicutiarairahi eta nímiturapianahi. Németeaca ímiyanavaichucha eta emasuapajiraivahi, tayanapanepuca ímahanupuca eta náriraya nuchavirayarehi te anuma, te návinehi acane, taicha nútí Manerejirunuhi ema Viya. Ácaicutiara eta nucayemaquenehi. Vahi étaparacaini eta néchaquene. Eta juca nímiturapiana, te esuapapa, étara ticaitarecaheya taicha yátupiquenerihi. ;Páurehehi eti váhiquenehi evarahahini esuapanu! —máichavacapa.

Eta juca macayemaqueneanahi ema Jesús, matupiruvahi eta máichiravacahi taicha máimatipahi eta napanereruana ena tijunijiacanayarehi, émapa ema tíjararecayarehi. Tacahe, máichavacapa:

—Puiti, evaraha ínajicanu. Eta tacahehi eta níchirahehi: “Nacarichu témunahiricavanaya tipauchanuana nácani máichuhaqueneanahi ema Tata” —máichavacapa.

Eta nasamirahi eta nacayemaqueneanahi, tínajicavanapa ena camuriqueneanainihi. Vaipa náimiyanavahini náehicahini ema Jesús. Tacahe, tiyaserecavipá viti dócequeneana máimitureanahi. Máichahavipa:

—¿Evarahainapapuca ejunijicanuyare éti apanavare?

Tacahe, ema Simón Pedro majicapapa:

—Tata maestro, vahi vijunijicavimahi, taicha nájina pácuti eta péchajiriruvana. Tétavicavahi eta tacaitarecaraivahi.

Víti vitupiruvahi eta visuapiravihi. Véchahivare eta yátupiquenéravihi Cristo, Machichaquenévihi ema yátupiquenehi Viya —máichapa.

Ema Jesús majicapapa:

—Dócehehinéni eti nunerejiruanahi. Mararihiserá ema

émana te etaracu, ema mávaháruhi ema Váinaraji —máichaha-
vipa.

Emá Jesús, máechajisihahi ema Júlasí. Taicha ema
Jesús máimatihí eta émaírayarehí tíjarareca, tayanapane éma
vídocenénihi víti apóstoleana.

Emá Jesús máechajisihapa eta másínehí

Tacahe, natíarihi ena tinerejicavana ena ticavasanahi te
Jerusalén, nacahepa éna:

—Emá maca, émara ema natanujirirúasa ena tuparairucana,
ema navarahaquenehi nacapaca táichavenehí eta máimijachi-
rava ema Cristo mavaneruhi ema Viya. Ímahasera éma,
vahi mapicacaracavahini eta macametarairuirahi te juca
Templo. Nájinavare ena tuparairucana nájaracavahini naca-
ratacahí. Nájinavare nacamatínacahí. ¿Nasuaparipapuca
puiti éna, eta émaírahí ema Cristo? Vémeteacásera
vuíchaha émaina ema Cristo, taicha vímatihí ema maca, étapa
eta máuchusínehí. Te máítecapa ema yátupíquene Cristo,
nájina téchaimahí távihapuca eta máuchusíhayare —naca-
hepa.

Émasera ema Jesús máimatihí eta napanereruana.
Tásiha, muracapanapa eta máechajisírahí eta te Templo máimi-
turesírahí. Ánípa macahe:

—¿Éti ímíjachava ímatínuhi, étapa eta núchusínehí! ¿Váhi-
sera ímati eta tímitécanuhi! ¿Váhívaré ímati ema Eternoque-
nehí, ema tívanécanuhi! Núti, vahi nútíjírírúvahníni eta
nítesírahí. Nútísera nímatihí éma taicha étaquenehi nási-
nehí eta mayehe eta nítecapauchírahí —máíchavacapa.

Eta nasamírahí éna tuparairucana, tíápájupánavahí eta
nasemanevahí. Navarahapa nacaratácayarehíni, náeratácaya-
repainí, vuíchahasera máisapahníni ema Viya eta nacaratásíra
éma. Natíarihísera camuriana ena tísuapanahí. Tásiha,
nacahepa:

—¿Vítí vémeteaca émarípa ema Cristo ema maca! ¿Taicha
nájina mácutí eta máíchírahí eta tíáramícareana máíchaquenea-
nahí ema maca! —nacahepa.

Ena Jesús, ena namicahu ena achaneana

Te táequenepa eta juca, tépanavavarepa tímitureca ena Jesús. Máichavacapa ena achaneana:

—Nútira numicauchahehi eti achaneana te juca apaquehe. Eta tacahe, nácani téhicanuanayare, vahi téjecapavanaimahi. Taicha eta nímiturapiana, étapa timícauchavacahi. Tásiha, nacatichainapa eta timapicu, vaipa napauchaimahi —máichavacapa.

Tásiha, ena fariséoana natiarihipahivare. Tacahe, náichapa:

—Pítijiváichucha péchajisiavahi. Tájina pisuapacarevaina.

Ena Jesús majicapavarepa:

—Tisuapacare eta juca néchajiriruvana, tayanapane nútijivahi néchajisiava. Taicha nímatihini nutuparahaichuhi eta nímeresiravayare. Nímatihivare eta nucaijuheyare. Étiserá vahi ímatihini távihapuca eta násinehi, váhivare ímati eta nucaijuheyare. Éti étachucha éhicahe eta nayeherepiana nanacaqueneana ena iáchucanaveanaini. Étasera tíchahehi eta épuruiranuhi. Nútiserá vahi népuruhéimahi éti. Jéhevareséra, te jácani sáchevare, népuruhepapuca táichavenehi eta emasuapirahi, tatupiruvayarehi eta népuruiraheya taicha vahi nácarichuimahi népuruhe nútí. Matiaríhi ena Tata tivanecanuhi. Ena apana máimahahi eta emasuapajiraivahi. Tépuruheyarehivare éma.

Éti tayehehi eta apaquehe. Nútiserá tayahenuhi te anuquehe. Eta iávasahi éti te apaquehe iávihahi. Nútí návasaichuhi te anuquehe. Eta tacahe, numetacahenumahi eta tanasinapa eta epecaturana te épenapa. Taicha te vahi esuapanuhini eta nútiquenérahí ena ecuchapaquenehi, tanasiyare eta epecaturana te épena —máichavacapa.

Tacahe, nayaserecapa éna:

—Piti pímiyachava mavaneruhi ena Viya. ¿Nájahavisica pítinavaji?

Ena máichavarepa:

—¿Áyahepapuca numetacahe? ¿Tétavicavahi eta tamuracavahi eta esamureana! Tavaraha muraca eta nucajachirahéya. Vuíchahasera nicha. Émasera ena tivanecanuhi,

tatupiruvahi eta máechajiriruvana. Eta tacahe, eta néchajírúv-
vana núti eyehe eti achaneana, étarichuhi eta nusamaquenea-
nahi mayehe —macahepa.

Énasera váhiquene nácaicutiarahini eta mametasiravacahi
eta mayehe ema Maiya. ²⁸Tásiha, máichavarepa:

—Jéhevaresera te ecatupihanupa te anuquehe, tapaenuma-
vainapa ímatínuyare eta nútiquenerahi ema Cristo ecuchapa-
quenehi. Ecaicutiarayareva yátupihí nímitucahe eta máimitu-
rapiána ema Tata. Vahi étaina nuviyahini te nuchuti nútijiri-
ruvainahini. Puíticha, ema Tata ticachanenuhi, vahi maju-
nijiacanuhini, váhivare nácarichuhini taicha nítauchaipahisera
núti eta mavarahaqueneanahi éma —máichavacapa éna.

Eta nasamirahi ena achaneana eta mametarapianahi, icha-
perinehi eta nasuapirahi ema Jesús ena camuriqueneana acha-
neana.

Títecapapa ema Jesús te Jerusalén

Te apanapa sache. ena nani achaneana
táimiyanaqueneanahi eta piéstayarehi eta Pascua,
nasamairiricapa eta máitecapirayarehi ema Jesús tayehe eta
avasare. Tiúrisamureanarinehi. Eta náurisamurevahi,
navehapa eta tajuru eta cáchipaca. Tiyananapa nácapahi
éma. Eta napiarasirapahi, ánipa nacahe:

—;Yare, Tata! ;Piti yátupiquenévihi rey viyehe viti
israelítana! ;Asulupaya! ;Piti vanáirucaquenévihi me Viya!
;Ichape eta vicunachiravi piti! ;Viva ema Viáquenu! ;Viva!
—nacahepa.

Ema Jesús ticaperapahi eta burricu eta masiapirahi,
taicha ene tacahehi eta táechajiriruvahi eta Sagrada Escritura:

“Eti ecavasanahi te Jerusalén. vaipa ecupica, taicha
márájapa ema eyeheyare Rey. Tímaticareyarehi éma,
ticaperayare eta burricuchicha. Mámaphi eta
iúritaresirayare” tacahehi eta Sagrada Escritura.

Eta juca ajureca eta vimacaicutiaraquenehi viti
máimitureana. Tapaenumava te máechepucapa ema Jesús,
vicaicutiarahi eta tacayemahi eta Sagrada Escritura,
táechajisihairahi éma, étapa eta tamutu eta apamuriana
máichararacavanahi.

Tiuri puiti, ena apamuriana achaneana tímararacanaripa
ema Jesús eta macaechepusirahi ema Lázaro te máecari,
náechajisihairahi éna eta náimahaquenehi. Eta tacahe,
camuriqueneanahi ena achaneana tiyananahi nácapahi éma,
taicha navarahahi náimati ema tíchahi eta tiáramicare.

Tímicuñarahi te vahi visuapa eta máechajiriruvana ema Jesús

Ema Jesús tijaranupa eta máechajisiravacahi ena achaneana. Máichavacapa:

—Nácani navarahahi tisuapanuana, tímaticareanaripa eta nasuapirahivare ema Tata, ema tivanecanuhi. Tacutiquene nácani tímatinuanahi eta nímiturapiana, náimatipahivare eta mapanereruana ema Tata. Taicha núti yátupiquenénuhi eta numicauchiravacahi ena téhicanuanahi te juca apaquehe. Váipasera tavehaimahi eta timapicu. Tacutiquene núti, vahi étaina táimitecanuhini te juca apaquehe eta nícuñacahehini eti achaneana. Eta tímitecanuhi, nucuchuhaheharehi. Nácanisera nasamairiricaripahinénipuca eta néchajiriruvana, váhisera nasuapanuhini, nasapiha tépurunuanahi, muracayarehi eta náicuñayare. Eta náepuruirahi eta néchajiriruvana, étaripa tiviuchavacainapa te jena sáchezare nacayaseserehipa te mamirahu ema Viya. Taicha vahi nútijiriruvainahini eta nímituresirahi. Ema Tata tivanecanuhi, éma tijaracanuhi eta nímiturapianayarehi. Eta tacahe, numetacahehi puiti tamutu eta numetacasivanahi. Vahi nuhapapicaimahi, taicha nímatihi tacaitarecayarehi nácani tisuapanahi eta máimiturapiana ema Tata —macahepa.



Éma Jesús, masipapevachavacapa éna máimitureana

Tiuri, te jena sácheanahi tamirahupaipahi eta Pascua, éma Jesús máecharipa táitecapauchayarepa eta majunijisirayarehi eta juca apaquehe. Tiyamayarepa mayehe éma Maiya. Tétavicavahi eta máemunasirahavihi viti máimitureana. Jéhesare éma Júlasí, máimipanerecharipa éma Váinarají eta máíjararesirayarehi éma Jesús. Émasera éma Jesús, máecharipa eta machavirayarepa mayehe éma Maiya taicha eta másínehi. Émarichuhi éma Maiya tíjaracahi eta tamutuirayarehi máituruequeneha. Tacahe, te jena yati, eta máenisirahavihi viti máimitureana, téchepucapa éma Jesús. Tivejamuhíacavapa eta mamuiríha.

Tiáyuruñequechavapa te mayehe paño. Tásiha, majucuhapa eta une te bañadora. Tépanavapa tisipapevachahavihi eta vívapeana viti máimitureana. Mavehavarepa eta paño, tíajapevachahavípa.

Tásiha, te macapayacapa éma Pedro, éma vahi máisapavahini eta masipapevachira eta máivape. Máichapa:

—Tata maestro, vahi táurica eta pisipapevachiranuhini nútí —macahepa.

Tásiha, éma Jesús majicapapa:

—Páuresamivíhi píti. Vuíchaha picaicutiarahini eta tacayemaqueneanahi eta juca. Achichuínapasera picaicutiarainapa.

Éma Pedro máichavarepa:

—Nútísera, vahi pisipapevachanuímahi.

Éma Jesús máichavarepa:

—Te vahi nucusipapevachaví, vaípa pítiparacaimahi eta nuyehe.

Tacahe, éma Pedro máichapa:

—Tata, vahi tácarichuímahi pisipaca eta nívapeana. Énerichuvare eta nuvahuana étapa juca nuchuti.

Tásiha, máichavarepa éma Jesús:

—Nácani nacaviravahi vahi tácomesaimahi tíápechavana ticasipana. Tacarichu ticasipayarehi eta náivapeana. Éti, epachihavacarípa; váhísera ámutuhini epachihahini —máichapa.

Éma Jesús máichahavihi eta juca vahi vámutuhini vipachihahini taicha máímatíhi éma tíjararecayarehi.

Te títavapa eta masipapevachirahavihi, ticamuirihavarepa eta mamuiriha. Tásiha, téjacapa te mesa. Máichahavipa:

—¿Ímatiequenehapuca éti eta juca níchirahehi? Eti ímijarechanu “Tata Maestro”. Étipicahisera, taicha yátupiquenénuhi eta numaestravahi. Eta níchirahehi nútí emaestro nusipapevachirahehi, ene ecaheyare éti eta ítaresiraya. Esipapevachacacayare eta ívapeana.

Éhicayare eta juca níchaquenehi. Étayareichu eta nímitusirahehi. Nutupiruva numetacahe: Ema musu vahi macachuricaimahi ema máquenu. Émaripa ema vanairucahi váhivare macachuricaimahi ema tivanecahi. Te yátupina ecaravahuinapa eta juca nímiturapiana, tájina íchiravaimahi.

Ema Jesús, jéhevare éma téhicacare eta vítecapiraya me Viya

Vahi ecueñamava éti. Ácasiñava eta me Viya: ácasiñavavare eta nuyehe. Taicha ánaqui te mávasa ema Tata, camuri eta tiáviravacare iávihayare éti, taicha ícuchihi éti. Tacahe, tatuparacahi nuyanayare nétupiricayare eta iávihayare. Te táuripa eta iávihayare, nútijapainavarepa nuchavainapa népanahénapa apaesa ácachanenu éti tayehe eta návihayare nútí. Eti ímatiripa eta nucaijuheya. Ímatipahivare eta achene nuyanihayare.

Tásiha, ema Tomás majicapapa:

—Tata, váhira vímati távihapuca eta picajuheyare: váhivare vímati eta achene piyanihayare —macahepa.

Ema Jesús majicapavarepa:

—Nútira néhicacare. Nútirichuva nuti yátupiquenénuhi. Nútivare nucaitarerahi, nájina apanaina ácasiñaimahi eta ítecapirayare me Tata. Eta ímatiranuipa nútí, ímatiripahivare ema Tata, taicha ímahanuripa puiti eta juca nucachanérahehi.

Eta esuapiranuhi tímereuchaheya eta yátupirahi eta émunasiranuhi. Tásiha, nútí nuyaseacainapa ema Tata máevataca ema Espíritu Santo. Éma, tímicatacaheyare, ticurisamurechaheyareva. Yátupiquenevare eta mávahásiraheyare eta ítaresirayare. Vahi tínajiacahémahi.

Éma, tímitucaheyare, máitametacayare tamutu eta yátupiqueneanahi tásihaqueneana eta me Tata.

Énaserá ena achaneana, vahi ticaijaracasianaimahi, taicha vahi návarahahini najacpahini éma. Eta namaratahairahi náimaha éma. náimijachahi vahi máimaticarehíni éma. Étisera ímatiyare éma, taicha máitavacacayare eta mávahásiraheyare. Núti, váhivare nujunijacahémahi. Nuchavayare eyehe, ecachanenuyareva.



Títicapana ena ticaratacanaya ena Jesús

Te títapiricapa ena Jesús eta mayujarasirahi, tiyana-
nana tíamamurihahavipa te apachara eta tatavarapi
ticaijare Cedrón. Ánaqui tatiarihi eta huerta ticaijare Getse-
mani. Visiapapa tayehe. Tacahe, ena Júlasí máimatihí eta
juca viávirarehi taicha ichapemurihi eta vicachanerahi ena
Jesús tayehe eta huerta. Tacahe, te jena yátiquenehi, títe-
capapa ena Júlasí. Mámamurihapaipahi ena oficialeana
énana ena camuriqueneanahi suntaruana romanoana, vanairu-
canahi éna nayehe ena tuparairucana, taicha napamicavacahi
ena fariséoana. Ticamicahuanapaipahi. Ticaepuchiriquia-
napi, étapa eta nayehe espada. Émasera ena Jesús
máecharipa eta nacaratasirayarehi. Tacahe, mácapavacapa
éna. Máichavacapa:

—¿Nájaha etánuca?

Ena najicapapa:

—Ena Jesús Nazareno vitanucapahi.

Éma máichavarepa:

—Nútira etánurepahi.

Ena Júlasí mapauchapa, máetserarecapa. Tásiha, titupi-
hachaha te machacaya. Eta majicapirahi ena Jesús,
máichirahi: “Nútira etánurepahi”, tíaquipaimuriavanapa ena
suntaruana te apaquehe. Tásiha, mayaserecavarepa ena
Jesús:

—¿Nájaha ena etánucapahi?

—Ena Jesús Nazareno —najicapavarepa.

Éma, máichavarepa:

—Cápachi numetacaheripahi nútihira etánurepahi. Te
nútichucha etánucanupahi, ísapayare nayana ena nani
—máichavacapa.

Étapaichuhi eta máechajiriruvahi ena Jesús te tiyujara-
caipa nájina émanainahini náemitiacahini te namuri ena máija-
raruanahi ena Maiya. Tacahe, ena Pedro, tatiarihihi eta
mayehe espada te mañáhe. Mavehapa, máechuchacachapa
eta machaca te vaure ena achane ticaijare Malco, mavanarahi
ena aquenuca Caifás. Émasera ena Jesús macahepa:

—Pinaca te tatumaramuhi eta piyehe espada. Vahi pihapapi-
caimahi eta táitachiravaya eta mavarahaquenehi ena Tata, taicha
nutuparahaichuhi mayehe eta juca nucatajivairaya —macahepa.

Éma Jesús námapa te mamirahu éma Pilato

Te jena yáficarahi, te tijarahipa, nacuchucapa éma Jesús te mapena éma Caifás. Námapa tayehe eta palacio mávihahi éma Pilato. Váipasera nasiapahini éna tuparairucana. Náimichuhahi éma Pilato. Nanasipa te aneca, namavarairahi náechipejicavahini eta nanisirayarehi eta cordero pascual te jena sache. Tacahe, éma Pilato tiúchucapa, máechajimurihapa éna. Máichavacapa:

—¿Tájaha eta maviurevahi éma maca achane íamaquene-pahi eta ani nuyehe? —macahepa éma Pilato.

Éna najicapapa:

—Jucarihi eta maviurevahi. Eta tacahe, viámaphi eta piyehe.

Tásiha, éma Pilato, máichavacapa:

—Eyana iama. Étina ícuñaca éma maca, taicha jararihi eta eyeherepichuhi eti israelítana —máichapa.

Éna najicapapa:

—Étaserá víti, vaipa ísapahavihini vítaucha eta viyeherepi vímicapaca mácani ticaviurevahi, vitupisica te márijahi. Émasera éma maca vivaraha máepena. Vivaraha pémetatacaini te crusu —nacahepa.

Tacahehi eta táitauchiravapaipa tamutu eta máechajiriruvanaphi éma Jesús eta máepenirayarehi te crusu. ³³Tisiapavarepa éma Pilato te tajuhe. Máichuhapa éma Jesús.

Tacahe, mayaserecapa:

—¿Yátupisareji réyvihí píti nayehe éna pijaneanana israelítana? —macahepa.

Éma Jesús máichapa:

—¿Pitupiruvahipuca eta juca píchiranuhi, pivarairahi pecha te yátupihipuca eta nurreyvahi? ¿Pitanucahipucasera eta nuviurevayare, picutihipuca eta napanereruhi éna nujaneanana israelítana? —máichapa éma Jesús.

Éma Pilato majicapavarepa:

—Vahi nímati eta epanereruana eti israelítana. Énarichuhi éna pijaneanana éna tuparairucana, éna tiámavianaphi eta ani nuyehe. ¿Tájaha eta piviuurevahi eta nayehe? —máichapa.

Tásiha, ema Jesús majicapavarepa:

—Jéhesare, jararihi eta návacurehi; váhisera étaina te juca apaquehe. Te étainahini te juca apaquehe eta návacurehi, téhacacauchanuaripahini ena nímitureanahi, váhivare nacucaratacanuhini ena ticatianacanuanahi. Taicha yátupiquenehi eta návacurehi, vahi étaina te juca apaquehe —macahepa.

Tacahe, ema Pilato mápechavarepa mayasereca:

—Tacahe, ¿yátupihí eta pirreyvahi? —máichapa.

Ema Jesús majicapapa:

—Yátupi réynuhi núti. Eta núcupaisirahi, núchucahi te juca apaquehe, nímiturecayarehi eta yátupiqueneana. Nácani tisuapajirahianayare, nasamararacayare eta yátupiqueneana —macahepa.

Ema Pilato macavanairipipa náetataca ema Jesús te crusu

Tacahe, ema Pilato macavanairipipa náestaca ema Jesús. Tásiha, ena suntaruana navehapa eta épire itapepi, náitsamemacapa. Nanacapa te machuti ema Jesús, majarapiyarehiji náicha. Namuiriachavarepa eta muíriare mularume. Tásiha, nachayacapa éma, nacavayuemarajipa nacaecahijiricapa. Ánipa nacahe:

—Tata, ¡pítitataji nayehevihiji Rey ena israelítana! —nacahepa.

Náehamirahavare te mamira.

Ema Pilato tiápechavarepa tiúchucahi. Tásiha, máichavacapa ena achaneana:

—Nímereca te emirahu ema maca achane. Nuvarahasera ácaicutiaraini eta tamajinairahi maviurevainahini eta nímairahi núti —máichavacapa.

Tacahe, nacuchucapa ema Jesús, mámapaipa eta itapepi te machuti, majarapihi náepiyaruhi éna, etapa eta namuriaruhi mularume. Tásiha, máichavacapa ema Pilato:

—Mácaripa ema maca achane. Ticaemecharáhiripa, ticaestaripavare. Maratapa —macahepa.

Te náimahapa ena tupairucana énapa ena nasuntaruana, tipiaracanapa:

—¡Pémetatareca te crusu! ¡Pémetatareca te crusu!
—nacahepa.

Éma Pilato máichavacavare:

—Núti tájina maviurevainahini eta nímairahi. Étina écha eta iámairaya éma. Étina émetatareca te crusu.

Éna najicapavarepa:

—Ichape eta maviurevahi ema maca eta viyehe, taicha tímijachavahi Machicha ema Viya. Vivaraha máepena, taicha váhiquene vísapahini eta juca —nacahepa.

Eta masamirahi ema Pilato eta machichairahipuca ema Viya ema Jesús, ichaperinehi eta mapisirahi.



Tisiapavarepa ema Pilato tayehe eta mayehe palacio.

Máichuhavarepa ema Jesús. Mayaserecavarepa:

—¿Nájahavisica píti? ¿Távihasica eta piásinehi?—macahepa.

Émasera ema Jesús, tájina vahi majicapahini.

Tásiha, ema Pilato máichavarepa:

—¡Vahi pivaraha pijicapanu! Péchapuca píti eta nuratahairahi nucuchucuhavi, énerichuvare nuratahavare nucavanairipi náetatacavi te crusu —macahepa.

Éma Jesús mapaenumavapa majicapa:

—Váhiquene piratahaimahi pítijiva pémetatarecanuhini te crusu. Émasera ema Tata tituparacavihi, mavarairahi títauchava eta mavarahaqueneanahi. Eta tacahe, ichape eta napecaturana ena títjararecanuanahi eta piyehe. Píti váhipanaichuhinéni eta pipecaturahi eta píchiranuhi —macahepa.

Tacahe, ema Pilato mavarahainipa macuchucuhayarehini
ema Jesús. Énasera ena tuparairucana tipiaracanavarepa:

—¡Te picaitica ema maca, vépiyaequenehaviyare mayehe
ema ichapequene aquenuca Emperador! ¡Ema maca achane
macatianaruhi ema Emperador taicha tímijachavahi rey!
—nacahepa.

Tacahe, te masamapa ema Pilato eta náechajiriruvahi
éna, tiyanapa te anuquehe, téjacapa tayehe eta máejasirare
apaesa namutuyarepa náimaha. Tacahe, tiánehiripa las
dóceyarehi eta sache macavanairipipa nama ema Jesús.
Tásiha, máichavacapa ena achaneana:

—¡Mácaripa ema eyehe Rey! —macahepa.

Énasera tipiaracanavarepa:

—¡Pémetatarecavane! ¡Máepenavanepa! ¡Váhiquene
vivaraha ema maca! —nacahepa.

Tásiha, ema Pilato máichavarepa:

—¡Vahi németatarecaimahi ema eyehe Rey! —macahepa.

Énasera ena tuparairucana najicapavarepa:

—¡Nájina apanaina viyehena Rey! ¡Macarichu ema Empe-
rador! —nacahepa.

Tacahe, ema Pilato máisapapa. Máíjaracavacapa ena
masuntarurana eta náetatasirayare ema Jesús. Jéhesaréinehi
námapa éma.

Náetatacapa te crusu ema Jesús

¹⁷Tacahe, náíjaracapa ema Jesús eta macurusuraya.
Tiúchucapa éma, mámapaipahi te majihu. Námapa eta te
Calvario (te hebreo ticaijare Gólgota). Tásiha, ema
Pilato máepiyacapa eta ajureca eta táechajiriruvahi, ánipa taca-
hehi: “Ema Jesús Nazareno, Rey nayehe ena israelítana”.
Te tápusi eta macurusura nanacapa eta juca ajureca. Natiari-
hivare ena apinana ticaetatanahivare te machacaya. Émasera
ema Jesús, te enumuhu mávihahi. Camuriana ena acha-
neana téchajicuhanahi eta ajureca, taicha eta macaetataiyahi
ema Jesús tacachacayaichuhi eta avasare. Eta ajureca, te
hebreo, te griego, téhepa latín. Mapana eta táechajiriruvanahi.

Te náítauchapa ena suntaruana eta náetatasirahi ema
Jesús, nasuertehachapa eta mamuiriha nayehe ena cuátroque-
neana. Navehavarepa eta apana mamuiriha. Étasera tájina

taparinahini, amairijuheichucha eta itsameruca. Vaipa návarahahini navetsayucahini. Tásiha, nasuertehachavarepa, náimairayarehi nájahayarehipuca mácani tivecuhayarehi.


Te tápecu eta macurusura ema Jesús, sutiarihihi esu maena, ésupa esu mápenaru, ésupa esu apana María mayena ema Cleofas, ésupa esu María Magdalena. Tacahe, te máimahapa esu maena eta sutiarahirahi te machacaya, nútipa nuti máimiturehi máemunaruquenehi, ánipa máicha ésu:

—Mémechicha, márahi ema nítivayare ema pichichayare. Éma títátiviyare.

Tásiha, énerichuvare tituparacanuwarepa núti:

—Némunacasare, nutuparacavi esu meme. Esu pényare. Pímainanu —máichanupa.

Jéhesaresera, núti Juan ichaperinehi eta nujacapirahi esu maena. Námapa te nupena.



Eta máepenirahi ema Jesús

Tacahe, eta máimairahi ema Jesús eta táitachiravaripa tamutu eta táechajiriruvanahi eta Sagrada Escritura, ánivare macahehi:

—Tétavicava eta numauneva —macahepa.

Tatiarihihi eta tisisica vino te tinaja. Náechipaijicapa eta machuchujiruyarehi. Náimicapayacapa tayehe eta majaca te tiúqui curina. Tacahe, machuchujicapa ema Jesús eta tisisica vino. Tásiha, macahepa:

—Jéhevare puiti, títauchavapa tamutu —macahepa.

Tásiha, téyusicapa. Tépenapa.

Ema émana suntaru mayuvaracapa te machene ema Jesús tayehe eta lanza

Tacahe, ena tuparairucana vahi návarahahini nánasihini ena ticaetatanahi te crusu te jena sache sávaru páscuairahi. Tacahe, tiyananapa mayehe ema Pilato, nayaseapanahi macavanairipihini eta nacavetupaiquechavacayarehi apaesa náepnavanehini. Navarahahi náecarávane, taicha tétavicavahi eta tacapicahuirahi nayehe éna eta jena sácheana páscuairahi.

Jéhesaréinehi, tiyananapa ena suntaruana, nacavetupaiquechavacapa ena apinana tiámerahiana nacaetataquenehi te crusu te machacaya ema Jesús. Tásiha, éneyareichuhivaréni ema Jesús. Téhesera te náitecapauchapa, náimahapa eta máepenirairahi. Tacahe, vaipa nacavetupaiquechahini éma.

Táitsivahisera ema émana suntaru mayuvaracapa te machene tayehe eta lanza. Enevanepa tiúchucahi eta iti étapa eta une. Núti Juan nájuequenehahi tamutu eta juca, nímahaqueneanahi. Nuvaraha nítametacahe tamutu. Yátupihivare eta numetasirahehi, taicha nuvaraha esuapahini éti apanavare. Títauchavahi eta juca táechajiriruvahi eta Sagrada Escritura: “Tájina vahi nacavetucaimahi eta máperana”.

Jararihivare eta apana Escritura, ánivare tacahe: “Náimahayare ema najarachaquenehi”.

Nacucupaicapa te crusu ema Jesús, náecarayarepa

Te tamutupa eta juca, matiarhihi ema achane José, ticasavahi te Arimatea. Émarichuhi tisuapajirahihi mayehe ema Jesús. Váhisera máimerecavahini, mapisiravacahi ena machamuriana aquenucarahana. Tiyanapa éma mayaseapanahi ema

Pilato eta máquehe ema Jesús. Tacahe sera ema Pilato máisapapa. Tiyanapa ema José, macucupaipanapa eta máquehe ema Jesús. Émapa ema Nicodemo macachanehi, ema téjirapanahi ema Jesús te jena yátimuhuquénehi. Mámapahi éma eta treinta kilo eta perfume mayajihayarehi. Tacahe, ema José émapa ema Nicodemo navehapa eta máquehe ema Jesús, náyuruacapa eta te sávana tijapu táurinaquenehi. Nayajihacavarepa tayehe eta táijyequene perfume. Tacahehi eta viyeherepi te vécarayare ena náepenaqueneana. Tacahe, te tachacaya eta máepeninehi ema Jesús, tatiarihihi eta huerta te távihahi eta mari natsecajueruhi ecariyare tacutihi eta covacha. Nájinaichaha nacaecarasihini tayehe. Éta pa náecarihahi eta máquehe. Tiputuvahuanapa taicha cáperehi-chicharihahi. Vahi taísapacarehini náecarahini te yati, váhivare taísapacarehini te apanapa sache taicha sávarumuhupahi.



Eta máechepusira ema Jesús te máecari

Tacahe, te jena sache lumincuquenehi, te tijararahichichapa, tiyanapa esu María Magdalena tayehe eta máecari. Timapicuichaha te suítecapauchapa eta ecari, suímahapa tájinaripahi eta márime tajihainihi eta tapajacurahi eta ecari. Te suímahapa, tichavavanepa tijunapapaipahi. Suíchuhapanayarehi ema Pedro nútipa nuti Juan. Timetacahavipa ésu:

—Námechapa jácani eta ñáquehéni eñi Viáquenu. Vaipa vecha távihahipuca nanasihahi —sucahepa.

Tacahe, nútí émapa ema Pedro viúchucapa viyanapa vijunapapaipahi. Nucachuricapa ema Pedro. Nítecapavanepe nútí tayehe eta máecari ema Viáquenu. Nétipaicapa. Nujíñañajuechapa. Tacarinehi nímaha eta máyuruhanainihi. Váhisera nusiapahini. Te títecapapa ema Pedro, tisiapapa éma tayehe eta ecari. Máímahapa eta máyuruhanainihi. Tanasirinecha enurujuhehi, étapa eta mamuhisiequene ema Jesús. Tacahe, nusiapavarepa nútí tayehe eta ecari. Nímahapa eta táichararacavahi. Tásiha, ichaperinehi eta nusupirahi. Vipaenumavapa vicaicutiarahi eta táechajiriruvahi eta Sagrada Escritura, eta máechepusirayarehi ema Viáquenu te máecari. Te tamutupa eta vímairahi, vichavapa te vipena.



Tímerecava ema Jesús nayehe ena máimitureana

Étarichu te jena sáchequenehi lumincuquene, yátiripahi, viúrujicavahi viti máimitureana ema Jesús te tajuhe eta peti. Vérateaquenerecavahi taicha eta vipisirahi ena tuparairucana. Tiáramicarepa titupihahi ema Jesús te vimuri. Téchajicahavipa:

—¿Ícharacava, nuchichanaveana? —máichahavipa.

Tásiha, tímechahavipa eta majarana te mavahuana étapa te machene. Tacahe, víti ichaperinehi eta viúrisamurevahi eta vímairahi éma. Tásiha, máichahavipa:

—Vahi ecueñamava. Núti, mavanerunuhi ema Tata núcupaicayare te juca apaquehe, nímitucaheyarehi éti. Puiti nuvanecheyare núti ímitucavacayarehi ena achaneana, apaesa náhicanuhini éna apanava —macahepa.

Tásiha, tiáchajuacahavipa víti. Tásiha, máichahavivarepa:

—Táuri eta ejacapiraina ema Espíritu Santo eta máitecapauchiraheya, mávahásiraheya. Éma, tímitucaheya eta ítametasiravacaya ena achaneana eta naperdonachacarevahi me Viya ena téneuchavanahi. Te vahi nacuvaraha téneuchavana, tanasiyare eta naviurevana taicha eta napecaturana —macahepa.



Éma Tomás vahi masuapa eta máechepusiraipahi éma Jesús

Te jena sache eta máimeresiravahi éma Jesús eta viyehe, májinahi éma vichamuri Tomás. Tásihasera, éna apamuriana vichamuriana nametacapa éma eta vímairaipahi éma Jesús. Émasera macahepa:

—Vahi nusuapa. Téhesera te nímaha eta majara te mavahu taicha eta clavo, nímisiapavare eta nuvauqui tayehe eta majara te machene, tapaenumava nusuapayare eta máechepusiraipahi —macahepa.

Te óchopa sache eta táetavisiravahi, viúrujicavaipavare te viúrujisirareva. Matiarhipahi éma Tomás te vimuri. Tásiha, tíamicarevarepa tímerécavahi éma Jesús. Titupihahi te vimuri. Téchajicahavivarepa.

—Ícharacava, nuchichanaveana —macahepa.

Tásiha, máichuhapa éma Tomás:

—Yare, nuchicha —máichapa—. Pímaha eta nujarana te nuvahuana. Pímisiapa eta pivauqui eta te juca nuchene, apaesa pisuapanu.

Tacahe, éma Tomás majicapapa:

—Tátachicha, piti yátupiquenévi Viya. Tétavicavahi eta nucasíñairavihi —máichapa.

Éma Jesús majicapapa:

—Nuchichasami Tomás, pipaenumava pisuapanu eta pímairanuipahi. Tétavicavasea náuricacareva nácani tisuapajirahianahi vahi tácomesahini náimahanuhini —macahepa.

Nuvaraha esuapa eta juca libro nájurehi

Jucarihichahavare eta apamuriana tíamicareana máichaqueneanahi éma Jesús, eta vímahaqueneanahi viti máimitureana. Váipasera tamutuhini tacajuhini te juca libro. Nuvarahasera ácaicutiara eta nájureanahi apaesa esuapahini éma Jesús eta émairaquenehi Cristo, Machichaquenehi éma Viya. Taicha te esuapapuca éma, máitavacacayare eta ítaresirayare.

Jucarihichaha eta apamuriana máichaqueneanahi éma Jesús. Váipasera támutuhini nájuequenéhahini, taicha tétavicavahi eta táichapemurivahi. Te vítametacapucaini tamutu eta máichaqueneanahi, váipapuca vicuratahahini vítuca, namutuhinéni éna achaneana te juca apaquehe tíájuequenerahiana.

Tamutupa eta juca nájurehi.